

18. oktober 2018

UKA2018/82

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Maannakkut ineqarnermut tapit pillugit malittarisassani isertitat tunngaviusarneri pinngitsoorani ilumut inunnet aningaasatigut pisariaqartitsinerpaaginnarnut atuunnersut pillugit allaaserinninnertalimmik misissuinnertalimillu UKA2019-mi nassuiaammik saqqummiusseqqullugit Naalakkarsuisut peqquneqarnissaanik Inatsisartut aalajangiiffigisassaattut siunnersuut. Aamma ilanngunneqassaaq init ataasiakkaat ingerlanneqarnerannut aningaasartuutit piviusut aqqissuussinerup qularnaartarnerai. Nassuiaammi aamma ilanngunneqassapput tigussaasut siunnersuutit innersuussinerillu Akileraartarnermut Atugarissaarnermullu Ataatsimiititaliap allaaserisai ineqarnermut tapiisarnermut tunngatillugu ataqatigiissaariniarnikkut ajornartorsiutaasartut ataatsimoortumik aqqiiviginiarlugit.

(Inatsisartunut ilaasortaq Tillie Martinussen, Suleqatigiissitsisut)

Inatsisartut suleriaasianni § 33 naapertorlugu inatsisartunut ilaasortap Tillie Martinussen-ip aalajangiiffigisassatut siunnersuutaanut Siumumiik imaattumik oqaaseqassaagut.

Innuttaasoq kinaluunniit peqqinnartumik akissaqarfigisaminillu ineqarnissaminut piginnaatitaaffeqarpoq, tamatumalu pitsaanerpaamik angusaqarfiginissaa siuarsarneqarnissaalu Siumumiik suleqataaffigerusuttorujussuugatsigu oqaatigissuarput.

Najugaqariaaseq, init pitsaasussaat tapeeriatsillu pillugit maani inersuarmi qassissaannimita oqalligilerpavut. Oqallinnerpassuit kingunerinik ingerlatseriaatsimut tunngatillugu aqqissuussinerit assigiinngitsorpassuit pisarnikuupput. Qujanaqaarlu ullumikkut killiffippiaq aallaavigalugu pisariaqartitsisunut ineqarnermut tapiissutinik naatsorsuisoqarsinnaammat ukiup siuliani isertitaasimasut aallaavigiunnaarlugit.

Siumumi ilisimalluarparput sineriassuatsinni piffiit ilarpassuini illut inissiallu amerliartuinnartut inuerunnikuusut. Inuerunnikuuneri assigiinngitsorpassuarnik pissuteqarput. Ilaatigut inissiap attartukkap pisoqaligaluttuinnartup akittoraluttuinnarneranik pissuteqarpoq, ilaatigullu najuiinnar-nissamat naleqqukkunnaarluinnarnera pissutaassarluni attartugaq peqqissutsimut akornutaale-rsinnaammat.

Tassalu inissiat attartukkat pisoqaappata najoruminaassisimagaluarpataluunniit apeqqutaatinnagu akittoraluttuinnartullu attartortut isertitaat aallaavigalugit pisortaniik tapiissuteqartariaqartarneq piulluni.

Aalajangiiffigisassatut siunnersuuteqartup tunngavilersuutaasa ilagaat suliuartariaqartugut sammui-artariaqarippullu innuttaasut iluaquserniarlugit aqqissuussinikkut ajornartorsiutit iluarsiniarlugit.

Taamatut oqarneq Siumumiik isumaqatigisorujussuugatsigu oqaatigissuarput.

Siuliani oqaatigaarput najukkat inoqarfippassuarni qimagarneqartut assigiinngitsunik pissuteqarsinnaasumik. Isumaqarpuguttaaq najukkat pitsaannginnerinik pissuteqartumik inuit inoqarfinnut anginernut nutsernerat pisoq.

Qulequttamut soqutiginaratumut ineqarnermut tapit pillugit allaaserinnittoqarsinnaanissaa anguneqassappat Siumumiit ilannguteqqullaqaarput nunatta isorartuup inuuffigissallugulu piffimmiit piffimmut allanngorartorujussuup kaperlattartumiinneq issinnerusumiittarnerlu eqqarsaatigalugit ukiuunerani aasaanerani pisariaqartitsisunut tapiisarnerit nikigassutaat ilannguullugit misissorneqarnissaat.

Taamatut oqaaseqarluta ataatsimiititaliami susassaqartumi aappasaanerreqarnissaminut suliarineqarnissaa innersuupparput.

Jess Svane
SIUMUT